



«03» փետրվարի 2022թ

ք.Երևան

Որոշում N __

ՎԱՐՉԱԿԱՆ ՏՈՒՅԺ ՆՇԱՆԱԿԵԼՈՒ ՄԱՍԻՆ

ՀՀ առողջապահական և աշխատանքի տեսչական մարմնի (այսուհետ՝ Տեսչական մարմին) ղեկավարի տեղակալ Գոհար Դարբինյանս, ուսումնասիրելով.

- 1) Տեսչական մարմնի ղեկավարի 2021թ.-ի հունիսի 07-ի թիվ 21060108 հանձնարարագիրը,
- 2) 2021 թվականի դեկտեմբերի 07-ի թիվ 21060108 ստուգման ակտը,
- 3) վարչական իրավախախտումների վերաբերյալ 2022 թվականի հունվարի 21-ի թիվ 159 արձանագրությունը,
- 4) վարչական իրավախախտումների վերաբերյալ գործի քննությանը մասնակցելու վերաբերյալ 2022 թվականի հունվարի 21-ի ծանուցումը,
- 5) վարչական իրավախախտման վերաբերյալ վարույթի այլ նյութեր:

Պարզեցի

Առողջապահական և աշխատանքի տեսչական մարմնի ղեկավարի 2021 թվականի հունիսի 07-ի թիվ 21060108 հանձնարարագրի հիման վրա ստուգելով ՀՀ ք. Երևան, Դանիել Վարուժանի փողոց 28/1, Տիչինայի փողոց, 3-րդ նրբանցք, 2/2 շենք հասցեներում գործունեություն իրականացնող «Նատալի Ֆարմ» սահմանափակ պատասխանատվությամբ ընկերությունում (պետական գրանցման համարը՝ 271.110.01887, տրված 12.12.1998թ., ՀՎՀՀ՝ 01222567, իրավաբանական հասցեն՝ ք. Երևան, Աբովյան 42-2) ՀՀ կառավարության 2020 թվականի ապրիլի 30-ի թիվ 718-Ն որոշմամբ հաստատված «Մասնագիտացված բժշկական օգնություն Պալիատիվ բժշկական օգնության և սպասարկման վերահսկողություն» Q 86.22 (ՏԳՏԴ)՝ N 3.1, «Մասնագիտացված բժշկական օգնություն Վերարտադրողական



(ռեպրոդուկտիվության) բժշկական օգնության և սպասարկման վերահսկողություն (ՏԳՏԴ ծածկագիր՝ Q 86.10, 86.22)»՝ N 3.2, «Մասնագիտացված բժշկական օգնություն և սպասարկում Մարդու արյան և դրա բաղադրամասերի դոնորություն և փոխներարկումային բժշկական օգնության և սպասարկման վերահսկողություն» Q 86.10, 86.21, 86.22 (ՏԳՏԴ)՝ N 3.4, «Մասնագիտացված բժշկական օգնություն Հիվանդանոցային գործունեություն (մինչև 18 տարեկան երեխաների): Բժշկական սպասարկման բնագավառի վերահսկողություն Q 86.10, 86.22 (ՏԳՏԴ)»՝ N 3.5, «Մասնագիտացված բժշկական օգնություն հիվանդանոցային գործունեություն (18-ից բարձր տարիքի անձանց) Բժշկական սպասարկման բնագավառի վերահսկողություն Q 86.10, 86.22 (ՏԳՏԴ)»՝ N 3.6, «Մասնագիտացված բժշկական օգնություն և սպասարկում Մանկաբարձագինեկոլոգիական հիվանդանոցային բժշկական օգնություն և սպասարկում Բժշկական սպասարկման բնագավառի վերահսկողություն (ՏԳՏԴ ծածկագիր՝ Q 86.10, 86.22)»՝ N 3.7, «Բժշկական և ստոմատոլոգիական պրակտիկա Ստոմատոլոգիական պրակտիկա Բժշկական սպասարկման բնագավառի վերահսկողություն» Q 86.23 (ՏԳՏԴ)՝ N 3.8, «0-ից 18 տարեկան անձանց արտահիվանդանոցային բժշկական օգնության և սպասարկման վերահսկողություն» Q 86.21, 86.22 (ՏԳՏԴ)՝ N 3.9, «18 տարեկանից բարձր անձանց արտահիվանդանոցային բժշկական օգնության և սպասարկման վերահսկողություն մեծահասակների և խառը տիպի պոլիկլինիկայում Q 86.21, 86.22 (ՏԳՏԴ)»՝ N 3.10, «Լաբորատոր-գործիքային ախտորոշիչ հետազոտությունների իրականացման վերահսկողություն Q 86.10, 86.21, 86.90 (ՏԳՏԴ)»՝ N 3.13, «Արտահիվանդանոցային մանկաբարձագինեկոլոգիական բժշկական օգնության և սպասարկման վերահսկողություն» Q 86.21, 86.22 (ՏԳՏԴ)՝ N 3.14, «Շտապ և անհետաձգելի բժշկական օգնության և սպասարկման վերահսկողություն» Q 86.22, 86.90 (ՏԳՏԴ)՝ N 3.15, «Դեղերի մեծածախ իրացման վերահսկողության» (ՏԳՏԴ ծածկագիր G46.46.2)՝ N 2.3, «Ստոմատոլոգիական պրակտիկայի սանիտարահիգիենիկ և հակահամաճարակային բնագավառի վերահսկողություն (ՏԳՏԴ ծածկագիր՝ Q 86.23)»՝ N 1.3, «Վնասակար բժշկական թափոնների մշակման և ոչնչացման սանիտարահիգիենիկ և հակահամաճարակային վերահսկողության (ՏԳՏԴ ծածկագիր՝ E 38.22.0, Q 86.10, 86.21.0, 86.22)»՝ N 1.12, «Վարակիչ հիվանդությունների համաճարակաբանական հսկողության պահանջների սանիտարահիգիենիկ և հակահամաճարակային վերահսկողության (ՏԳՏԴ ծածկագրեր՝ Q 86.10, 86.21.0, 86.22)»՝ N 1.15, «Մանրէազերծման գործունեության սանիտարահիգիենիկ և հակահամաճարակային վերահսկողության (ՏԳՏԴ ծածկագիր՝ Q 86.10)»՝ N 1.17, «Ախտաբանաանատոմիական մասնագիտացված բժշկական օգնության սանիտարահիգիենիկ և հակահամաճարակային

վերահսկողության (ՏԳՏԴ ծածկագիր՝ Ո 86.10)»՝ N 1.9 ստուգաթերթերով նախատեսված բոլոր հարցերը:

Ստուգում անցկացնելու ամսաթիվը՝ 23.06.2021թ. - 17.11.2021թ.: Ստուգման ժամանակ ուսումնասիրվել են 1998 թվականի դեկտեմբերի 12-ից մինչև ստուգման ավարտը Ընկերությունում լրացվող, վարվող և շրջանառվող բժշկական փաստաթղթերը:

Իրականացված ստուգման արդյունքում գործում առկա նյութերի ուսումնասիրությամբ պարզվեց, որ Ընկերության արտահիվանդանոցային ճառագայթային ախտորոշման (ռենտգենաբանական) կաբինետի միջին բուժաշխատող Քրիստինե Աբելյանի կողմից վարվող «միջին բուժաշխատողի աշխատանքի գրանցամատյան»-ը չի համապատասխանում սահմանված ձևաչափին, չի լրացվում օրենքով սահմանված կարգով գրանցամատյանում նախատեսված սյունակները (հիմք՝ գրանցամատյան) (Ստուգաթերթի 6.2-րդ կետ), որով խախտվել են «Բնակչության բժշկական օգնության և սպասարկման մասին» ՀՀ օրենքի հոդված 31-ի 1-ին մասի 6-րդ կետի, ՀՀ առողջապահության նախարարի 2013 թվականի հուլիսի 3-ի «Հայաստանի Հանրապետությունում կիրառվող մի շարք բժշկական փաստաթղթերի ձևերը հաստատելու մասին» N 35-Ն հրամանի հավելված N 14-ի պահանջները:

Հիմք ընդունելով «Վարչական իրավախախտումների վերաբերյալ» ՀՀ օրենսգրքի 255-րդ հոդվածը 2022 թվականի հունվարի 21-ին կազմվել է վարչական իրավախախտումների վերաբերյալ N 159 արձանագրությունը, որը վարչական իրավախախտումների վերաբերյալ գործի քննության ծանուցագրի հետ միասին առձեռն հանձնվել է Քրիստինե Աբելյանին: Վերջինս տվել է բացատրություն առ այն, որ ինքը 2015 թվականից չի ապրել Հայաստանի Հանրապետությունում, վերադարձել է 2021 թվականի փետրվար ամսին: Աշխատանքի է ընդունվել 2021 թվականի հունիսի 4-ից՝ որպես ռենտգեն-տեխնիկ: Ինքը տեղյակ չի եղել ՀՀ օրենքների փոփոխություններից:

Տեսչական մարմնում 2022 թվականի փետրվարի 03-ին տեղի է ունեցել վարչական իրավախախտման վերաբերյալ գործի քննություն, որին պատշաճ կարգով ծանուցված Քրիստինե Աբելյանը չի ներկայացել: Վերջինս չի ներկայացրել միջնորդություն գործի քննությունը հետաձգելու մասին:

2. Պատճառաբանական մաս

Վարչական մարմինը հաստատված է համարում, որ Քրիստինե Աբելյանի կողմից խախտվել են «Բնակչության բժշկական օգնության և սպասարկման մասին» ՀՀ օրենքի 31-րդ հոդվածի 1-ին մասի 6-րդ կետով, ՀՀ առողջապահության

նախարարի 2013 թվականի հուլիսի 3-ի «Հայաստանի Հանրապետությունում կիրառվող մի շարք բժշկական փաստաթղթերի ձևերը հաստատելու մասին» N 35-Ն հրամանի հավելված N 14-ով սահմանված պահանջները:

«Վարչական իրավախախտումների վերաբերյալ» ՀՀ օրենսգրքի 267-րդ հոդվածի 1-ին մասի համաձայն՝ «Վարչական իրավախախտման վերաբերյալ գործը քննվում է վարչական պատասխանատվության ենթարկվող անձի ներկայությամբ: Գործը կարող է այդ անձի բացակայությամբ քննվել միայն այն դեպքերում, երբ տվյալներ կան գործի քննության տեղի և ժամանակի մասին նրան ժամանակին ծանուցելու վերաբերյալ և եթե նրանից միջնորդություն չի ստացվել գործի քննությունը հետաձգելու մասին»:

«Բնակչության բժշկական օգնության և սպասարկման մասին» ՀՀ օրենքի 31-րդ հոդվածի 1-ին մասի 6-րդ կետի համաձայն՝ ավագ և միջին բուժաշխատողները պարտավոր են՝ օրենսդրությամբ սահմանված կարգով լրացնել, վարել և շրջանառել բժշկական փաստաթղթերը, այդ թվում՝ էլեկտրոնային առողջապահության համակարգում:

ՀՀ առողջապահության նախարարի 2013 թվականի հուլիսի 3-ի «Հայաստանի Հանրապետությունում կիրառվող մի շարք բժշկական փաստաթղթերի ձևերը հաստատելու մասին» N 35-Ն հրամանի հավելված N 14-ով հաստատվել է «Միջին բուժաշխատողի աշխատանքի գրանցամատյան»-ի ձևը:

Վարչական իրավախախտումների վերաբերյալ գործի քննության արդյունքում վարչական մարմինը, քննելով գործում առկա բոլոր փաստական հանգամանքները, հաստատված է համարում, որ կատարվել է վարչական իրավախախտում, որի համար պատասխանատու է Քրիստինե Աբելյանը (ՆՔ 011510609, տրված՝ 22.02.2021թ. 005-ի կողմից):

Վերջինիս կողմից վարչական իրավախախտում կատարելու մեջ առկա չեն «Վարչական իրավախախտումների վերաբերյալ» ՀՀ օրենսգրքի 33-րդ և 34-րդ հոդվածներով սահմանված վարչական պատասխանատվությունը մեղմացնող և ծանրացնող հանգամանքներ:

«Վարչական իրավախախտումների վերաբերյալ» ՀՀ օրենսգրքի 9-րդ հոդվածի համաձայն՝ վարչական իրավախախտում (զանցանք) է համարվում պետական կամ հասարակական կարգի, սոցիալիստական սեփականության, քաղաքացիների իրավունքների և ազատությունների, կառավարման սահմանված կարգի դեմ ունեցվող հակաիրավական, մեղավոր (դիտավորյալ կամ անզգույշ) այնպիսի գործողությունը կամ անգործությունը, որի համար օրենսդրությամբ նախատեսված է վարչական պատասխանատվություն: Նշված իրավանորմից հետևում է, որ օրենսդիրը վարչական իրավախախտման առկայության հիմքում դրել

է մեղքի առկայությունը, որը կարող է դրսևորվել դիտավորությամբ կամ անզգուշությամբ:

Վարչական մարմինը գտնում է, որ Քրիստինե Աբելյանի կողմից իրավախախտումը կատարվել է անզգուշությամբ:

«Վարչական իրավախախտումների վերաբերյալ» ՀՀ օրենսգրքի 11-րդ հոդվածի համաձայն՝ վարչական իրավախախտումը համարվում է անզգուշությամբ կատարված, եթե այն կատարած անձը կանխատեսել է իր գործողության կամ անգործության վնասակար հետևանքների առաջացման հնարավորությունը, բայց թեթևամտորեն հույս է ունեցել կանխելու դրանք կամ չի կանխատեսել այդպիսի հետևանքներ առաջանալու հնարավորությունները, թեև պարտավոր էր և կարող էր կանխատեսել դրանք:

Վարչական մարմնի կողմից ուսումնասիրության առարկա է դարձվել նաև Քրիստինե Աբելյանի կողմից լրացվող գրանցամատյանը. արդյունքում արձանագրվել է, որ այն չի համապատասխանում օրենքով սահմանված ձևաչափին, սակայն հաշվի առնելով այն հանգամանքը, որ վերջինիս կողմից լրացումները կատարվել են թերություններով՝ չեն լրացվել սահմանված ձևաչափով պահանջվող սյունակները, ուստի Վարչական մարմնի կողմից արարքը դիտարկվել է ոչ թե որպես «Միջին բուժաշխատողի աշխատանքի գրանցամատյանի» չվարում (սույն խախտման համար պատասխանատվություն է նախատեսված «Վարչական իրավախախտումների վերաբերյալ» ՀՀ օրենսգրքի 47.18-րդ հոդվածի 2-րդ մասով՝ 50.000 ՀՀ դրամից մինչև 60.000 ՀՀ դրամ վարչական տուգանքի տեսքով), այլ որպես գրանցամատյանի լրացման սահմանված կարգի խախտում (սույն խախտման համար պատասխանատվություն է նախատեսված «Վարչական իրավախախտումների վերաբերյալ» ՀՀ օրենսգրքի 47.18-րդ հոդվածի 3-րդ մասով՝ 20.000 ՀՀ դրամից մինչև 30.000 ՀՀ դրամ վարչական տուգանքի չափով):

«Վարչական իրավախախտումների վերաբերյալ» ՀՀ օրենսգրքի 282-րդ հոդվածի 1-ին մասի համաձայն՝ «Քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝

- 1) վարչական տույժ նշանակելու մասին.
- 2) գործի վարույթը կարճելու մասին»:

«Վարչական իրավախախտումների վերաբերյալ» ՀՀ օրենսգրքի 47.18-րդ հոդվածի 3-րդ մասի համաձայն՝ «Պարտադիր վարման ենթակա բժշկական (այդ թվում՝ էլեկտրոնային) փաստաթղթերի լրացման կամ շրջանառության պահանջները խախտելը առաջացնում է տուգանք՝ սահմանված նվազագույն աշխատավարձի քսանապատիկից մինչև երեսնապատիկի չափով»:

3. Եզրափակիչ մաս

Ղեկավարվելով «Վարչական իրավախախտումների վերաբերյալ» ՀՀ օրենսգրքի 230-րդ, 279-րդ, 281-րդ, 283-րդ հոդվածներով և 282-րդ հոդվածի 1-ին մասով՝

Որոշեցի

1. Քրիստինե Աբելյանին՝ որպես խախտում թույլ տված անձի, «Բնակչության բժշկական օգնության և սպասարկման մասին» ՀՀ օրենքի 31-րդ հոդվածի 1-ին մասի 6-րդ կետը խախտելու համար, «Վարչական իրավախախտումների վերաբերյալ» ՀՀ օրենսգրքի 47.18-րդ հոդվածի 3-րդ մասով ենթարկել վարչական տույժի՝ սահմանված նվազագույն աշխատավարձի քսանապատիկի չափով՝ 20.000 (քսան հազար) ՀՀ դրամ վարչական տուգանքի:

2. Սույն որոշումը ծանուցել Քրիստինե Աբելյանին (ք. Երևան, Նոր Նորքի 4-րդ զանգված Ա.Արությունյան փ. 6/122 բն. 31):

3. Սույն վարչական ակտն ուժի մեջ է մտնում մասնակցին իրազեկելու հաջորդող օրվանից:

4. Սույն որոշումը ստանալու օրվանից 30 օրվա ընթացքում կարող է բողոքարկվել ակտն ընդունած Տեսչական մարմին կամ ՀՀ վարչական դատավարության օրենսգրքի 72-րդ հոդվածով սահմանված ժամկետում՝ ՀՀ վարչական դատարան:

5. Իրերի և փաստաթղթերի հարցը լուծվել է:

ՂԵԿԱՎԱՐԻ ՏԵՂԱԿԱԼ՝

 Recoverable Signature

X 

ԳՈՀԱՐ ԴԱՐԲԻՆՅԱՆ

Signed by: DARBINYAN GOHAR 5705820186

ԳՈՀԱՐ ԴԱՐԲԻՆՅԱՆ

Ինձ բացատրվել է, որ համաձայն «Վարչական իրավախախտումների վերաբերյալ» ՀՀ օրենսգրքի 305-րդ հոդվածի 1-ին մասի, տուգանքը պետք է վճարվի տուգանք նշանակելու մասին որոշումը հանձնելու օրվանից ոչ ուշ, քան տասնհինգ օրվա ընթացքում, իսկ այդ որոշումը գանգատարկելու կամ բողոքարկելու դեպքում՝ գանգատը կամ բողոքը առանց բավարարման թողնելու մասին ծանուցման օրվանից ոչ ուշ, քան տասնհինգ օրվա ընթացքում:

Ծանոթություն՝

Իրավախախտման համար կիրառվող տուգանքի վճարման պետրյուջեի հաշվի համարը՝ ՀՀ առողջապահական և աշխատանքի տեսչական մարմնի կողմից իրավախախտումների համար կիրառվող տուգանքների և պատժամիջոցների մուտքեր **N900005024097**:

Որոշումը ստացա _____
(անունը, հայրանունը, ազգանունը, պաշտոնը, ամսաթիվը)

Որոշումը ստանալուց և ստորագրելուց հրաժարվելու մասին նշում _____

Նշում որոշումը պատվիրված փոստով ուղարկելու և ստանալու ծանուցման մասին

(ուղարկելու ամսաթիվը, փոստային առաքանու համարը, փոստային առաքանին հասցեատիրոջը հանձնելու վերաբերյալ ծանուցագրի համարը)